

Oschtrzeit

No eem eisich-lange Winter
Hat de Lenz sich dorchgerung,
Selbscht de allrgreschte Sinder
Hat jetzt „Halleluja“ g’sung.

Unnr dee mr manche find,
Der mit eig’nem „Halleluja“
`S Faschte an de Nagel bind
Un ruft: „Mit’m Käs is huja!“

Denn, was e echte Schwob sich nennt,
`S Esse un Trinke net veracht;
Am beschte in dr Speis mr’s kennt:
Forr’s ganzi Johr iss g’schlacht.

Er iss mi’m ganzi Herz bereit,
Zu achte seiner Ahne Breich;
Er freit sich uff die Oschterzeit
Un e bissl’che uff’s Himmelreich.

Die Täch vor Oschtre wird wenich gess,
Grindunnerschtach Aier mit Spinat,
Karfreitag’s Faschte net vrgess,
Mit gepatschtem Kukruz un Salat.

Sogar an Christi Sterwetach –
E Tach, wu alli Arwweit ruht,
Weil Gottes Sohn erlitt fill Schmach –
Vrliere se net de Mut.

Die Ratscher sinn im Element,
In alli Gass’ wird Schlaaball g’spielt;
E jedr schunn uff Oschtre brennt,
Mit Sehnsucht iss sei Herz erfillt.

Die Kinner hann scheen’s Nescht gemacht,
Dass die Oschtrhaase net vergesse
Rinn zu leje ihre Sach:
Sie sinn so brav gewese.

Dann gehen se schnell zu Good un P'hatt
Ihre Hengschte un P'huppe holle;
Sie krien dort noch so manche Rat,
Doch kenne vum Oswald Kolle.

Am Oschtrmontag war es Sitte,
Die junge Mädle all' zu necke,
Dann um e guti Ernt' zu bitte
Un g'weihte P'halm ins Feld zu stecke.

So kann mr alli Zeit mit Recht
Vum frohe Oschtre redde,
Un jeder freit sich echt,
Denn g'sprengt sinn alli Kette.

Was ich erwart, vollend sich nun,
Gebore iss e neie Geischt;
Was Schatte war, des iss vrschwumm:
Die nächshti Zeit fill Licht erheischt.